



Naalakkersuisut peqquneqassasut aasaanerani nalunaaquttap nikittarnera pillugu, Namminersornerullutik Oqartussat Nalunaarutaat nr. 19, 5. Oktober 2006-imeersup, atorunnaarsinneqarnissaannik, aalajangiiffigisassatut siunnersuut. (Inatsisartunut ilaasortaq Per Rosing-Petersen, Attaviitsoq)
(Siullermeernera)

Demokraatini siunnersuuteqartup siunnersuummi tunngavilersuutai isumaqatigaagut, oqarmat aasaanerani nalunaaquttap nikittarnera qanganitsereernikuusooq immaqalu atulinngisaannarsimasussaagaluartooq. Tamanna isumaqatigiissutigisinnaavarput.

Kisianni uangut ingerlariaqqikkusuppugut isummersorfigersullugulu piffissamik naatsorsuisarnek sorleq uangutsinnut pitsaanerpaassanersoq. Assersuutigalugu Amerikap kangiani piffissamik uuttoriaatsimik atuilissagutta tamanna teknikkikkut akorngutissaqanngilaq. Piviusunngussappat amerlanerpaat najugaqarfianni Kalaallit Nunaata kujataata kitaani ukiukkut silap qaamasarnera inuit sulisartut soraalerneranni takkuttassaaq taamaasillunilu pinngortitamukartoqarsinnaalissagaluarpoq imaluunniit silamiiginnartoqarsinnaavoq taarsinissaata tungaanut. Taamaalippat peqqinnarnerusumik inuulissaagut.

Isumaqarpugulli aatsaat taamatut alloriassasugut isumaqataasut akerliusullu tunngavilersuutaat tamaasa tusareerutsigit nalilersorneqareerpatalu. Taamaattumik imaattumik allannguutissatut siunnersuummik saqqummiussissaagut:

Namminersornerullutik Oqartussat Nalunaarutaata nr. 19p, 5. Oktober 2006-imeersup atorunnaarsinneratigut aasaanerani nalunaaquttap nikittarneranut atatillugu iluaqutit akorngutillu misissorneqarnissaat pillugu Naalakkersuisut peqquneqarnissaannut inatsisartut aalajangiiffigisassaattut siunnersuut. Aamma misissoqquneqarpoq ullumikkut piffissamik naatsorsuisarnermut naleqqiullugu allaanerusumik atuilernissap iluaqutissartai akorngutaalu. Piffissamik naatsorsuutit UTC, UTC-3 aamma UTC-5 (tamarmik aasaanerani atuuttut) minnerpaamik misissuinermut ilanngunneqassapput.

Taamatut allannguutissamik siunnersuuteqarluta inassutigaarput siunnersuut ataatsimiititaliami susassaartumi suliarineqassasoq.